

Dragi prijatelji/ce,

Pred vama se nalazi **majsko** izdanje mjesečnog informativnog biltena Omladinskog resursnog centra (ORC) Tuzla i Omladinske mreže Bosne i Hercegovine koja za sada broji **177** organizacija i **113** pojedinaca iz **75** mjesta BiH.

Bilten izlazi na bosanskom-srpskom-hrvatskom i engleskom jeziku. Sadrži kratak pregled aktivnosti ORC-a Tuzla, te informacije o mjesečnim aktivnostima omladinskih organizacija i grupa - članova Omladinske mreže Bosne i Hercegovine, njihove planove za naredni period, te sve ostale korisne i zanimljive obavijesti kao što su pozivi donatora, pozivi na konferencije i seminare, školarine, stipendije, poslove i sl.).



Ukoliko želite da budete na mailing listi za naredna izdanja mjesečnog informativnog biltena ili ako imate pitanja ili sugestije, javite nam se. Mjesečni informativni bilten, kao i arhivu dosadašnjih izdanja možete naći i na web stranici Omladinske mreže Bosne i Hercegovine:

<http://www.omladina-bih.net>

Uživajte u čitanju!!

SADRŽAJ

Aktivnosti u maju 2015.	2
Planovi za juni 2015.	6
Aktivnosti dijela članica mreže	7
Novi članovi	22
Informacije / donatori / pozivi	24

AKTIVNOSTI ORC/ hCa U MAJU 2015.

✚ Prekogranična građanska mreža za mir, pomirenje i sigurnost ljudi na Balkanu



U okviru projektnih aktivnosti u ovom regionalnom, partnerskom projektu, Omladinski resursni centar (ORC) Tuzla nastavlja sa rad na istraživanju „Aspekt ljudske sigurnosti mladih koji žive u kolektivnim centrima, ili „alternativnim smještajima“ u BiH. Kroz aktivnosti, unutar istraživanja ćemo se fokusirati na dva glavna pitanja: Sa kojim opasnostima/problemima koji se tiču ljudske sigurnosti se susreću mladi u kolektivnim centrima ili alternativnim smještajima u BiH? i koje su to opasnosti i poteškoće sa kojima se mladi susreću nakon odlaska iz kolektivnih centara i alternativnih smještaja.

Tokom narednih mjeseci, istraživači iz PRONI-ja Brčko će obići pet najvećih kolektivnih centara i alternativnih smještaja: Tuzla (Mihatovići), Živinice (Višća), Doboј (Dom penzionera), Bratunac (Kravice) i Brčko distrikt (Prutače). Planirano je da tokom istraživanja održimo 10 fokus grupa i 18 intervju. Više o ovim aktivnostima možete pročitati u našim sljedećim biltenima, kao i na:

www.omladina-bih.net

Projekat „Prekogranične građanske mreže za mir, pomirenje i sigurnost ljudi na Balkanu“ implementira Helsinški parlament građana Turska, zajedno sa partnerima: ADP ZID Crna Gora, SeConS Srbija, Institut za regionalne i internacionalne studije Bugarska, Centar za istraživanje, dokumentaciju i publikovanje Priština Kosovo, Omladinski resursni centar Tuzla. Projekat je podržan od Evropske Unije.

✚ OMLADINSKA GRUPA ORC TUZLA

► DATE THE STATE

U toku mjeseca maja realizovana je posljednja aktivnost projekta „Date the state“. Posljednja aktivnost predstavljala je upoznavanje 50 mladih Tuzlanki i Tuzlaka sa najvišom institucijom Bosne i Hercegovine – Parlamentarnom skupštinom BiH.

Podsjećanja radi, „Date the state“ imao je za cilj upoznati mlade sa političkim aparatom BiH, Ustavom BiH, te sa Dejtonskim mirovnim sporazumom i dešavanjima koja su mu prethodila. Navedeno je realizovano u toku mjeseca aprila kroz trening radionice koje su održane u Kući plamena mira.



Mladi su se 8. maja organizovanim prevozom iz Tuzle uputili u Sarajevo, i tog dana imali priliku upoznati se sa salama u kojima se donose odluke od najviše važnosti za Bosnu i Hercegovinu.

Tokom posjete Parlamentu, mladi su mogli čuti govore naših aktivista Zade Bešić i Kemala Nedžibovića, koji su govorili o izbornom zakonu u BiH, odnosno važnosti doprinosa mladih BiH mladih za EU integracije.

Učesnicima se također obratio i Jasmin Hasanović, zlatni student Fakulteta političkih nauka u Sarajevu sa temom „Mladi u postdejtonskom periodu“.

Članovi Omladinske grupe projekat realizuju na volonterskoj osnovi, te svojim primjerom pozivaju i druge mlade iz Bosne i Hercegovine da im se pridruže. Projekat je podržan od strane Fondacije tuzlanske zajednice kroz program Omladinska banka. Partner na projektu je „Kuća plamena mira“.

► MEĐUNARODNI SAJAM MEDICINE - REMEDIUM

U Tuzli je održan drugi po redu Međunarodni sajam medicine REMEDIUM, u periodu od 6.– 8. 5. 2015.g. Cilj sajma je bio na jednom mjestu okupiti sve zainteresovane skupine u zdravstvu, te omogućiti povoljnije okruženje za unaprijeđenje zdravlja ljudi, brži razvoj medicine, lakše predstavljanje novih tokova i tehnologija, napredak poslovanja u zdravstvu, farmaceutskoj industriji, te jednostavniju komunikaciju između članova različitih skupina u zdravstvu.

Naglasak je posebno bio stavljen na potrebu učešća mladi ljudi i studenata na ovakvim manifestacijama, sa ciljem građenja novih kontakata, kao i zbog ubrzanog razvoja medicine s kojima mladi studenti moraju biti u toku. Ispred omladinske grupe ORC Tuzla učestvovao je **Mujanović Adnan**.



► MUNJA INKUBATOR - NEOBIČNA PUTOVANJA ZA STUDENTE



U Tuzli je 28. 5. na Ekonomskom fakultetu održana prezentacija za studente „Putujmo u Europu“. Na prezentaciji se moglo čuti dosta korisnih informacija oko programa koji daje mogućnosti da 22 dana 25 studenata iz BiH putuje Europom potpuno besplatno. Uz sve to, studenti su dobili brojne informacije oko ljetnih volonterskih kampova.

Domaćin je bio Ekonomski fakultet, a prezentatori su bili članovi Munja inkubatora iz Sarajeva. Članica Omladinske grupe **Lejla Zonić** je prisustvovala prezentaciji.

► DJEČIJI SAJAM

U Tuzli je u SKPC Mejdan, u periodu od 8. do 10. maja održan „Dječiji sajam“ pod sloganom – *Baš svašta za malu raju*. Na sajmu su se predstavili zdravstveno bezbjedni, ekološki proizvodi namijenjeni igri, te zdravom i pravilnom rastu i razvoju djece, dječija literatura, hrana, proizvodi za higijenu, itd. U okviru sajma održane su i dječije radionice i igraonice, a na sajamskoj pozornici, gdje su se predstavili veliki i mali glumci, plesači, pisci, itd. Programski koncept sadržava i humanitarnu notu – aktivnosti za djecu s posebnim potrebama.



Jedan od voditelja radionica bio je i član naše grupe **Mujanović Adnan**, koji je kroz radionicu „Mali liječnici“ pokušao približiti cjelokupnu profesiju rada u zdravstvu mlađoj populaciji, kao i smanjenju straha od doktora kod istih putem igre i smijeha.

► **BOSPO KONFERENCIJA - PERSPEKTIVE OBRAZOVANJA ODRASLIH U TK**



U Dramar centru u Tuzli se 20. maja održala konferencija "Perspektive obrazovanja odraslih u TK", a pod organizacijom Udruženja BOSPO iz Tuzle. Ovaj projekat općenito podržava i doprinosi konceptu cjeloživotnog učenja i obrazovanja odraslih. Opći cilj projekta je podrška u uspostavljanju sistema cjeloživotnog učenja u Tuzlanskom kantonu kroz povećanje socijalnog dijaloga i sistemskim poboljšanjem u oblasti obrazovanja odraslih. Projekat je podržan od Evropske unije u BiH. Na konferenciji je prisustvovala i naša članica **Lejla Zonić**.

► **DIJALOG: STRATEGIJA PREMA MLADIMA U FBIH 2016 - 2020**

25. maja je u Sarajevu svečano otvoren „Dijalog: Strategija prema mladima“, prvi javni događaj koji organizira Radna grupa za izradu Strategije, kako bi se obavile konsultacije i otvorio dijalog s relevantnim organizacijama u omladinskom sektoru Federacije Bosne i Hercegovine i s mladim ljudima.

U dijalogu je tokom dva dana učestvovalo oko 80 nevladinih organizacija koje se bave pitanjima mladih, omladinskih udruženja, te Vijeća mladih. Lejla Zonić je došla ispred inicijatorske grupe Vijeća mladih Grada Tuzla. Lejla je također bila odabrana da bude u radnoj grupi koordinatora ove strategije, Adisa Salkića, pomoćnika ministra Federalnog ministarstva kulture i sporta (Sektor za mlade).



► **SMJERNICE O INKLUZIVNOM GRAĐANSTVU, ITALIJA**

U periodu od 5.- 10. 5. 2015. godine u općini Zola Predosa, Italija održala se četvrta, koja je ujedno i završna aktivnost projekta WOW. Tema ovog susreta bila je „Smjernice o inkluzivnom građanstvu“. Cilj projekta je uspostavljanje mreže između partnerskih općina koje su izrazile interes za izgradnju partnerstva u oblasti integracije i interkulturalnog dijaloga, kroz proaktivno učešće mladih.



Delegaciju iz Tuzle činili su predstavnici grada Tuzla, Zavoda za obrazovanje osoba sa smetnjama u psihičkom i fizičkom razvoju Tuzla, Fondacije tuzlanske zajednice i Udruženja građana oštećenog vida Tuzla.

Pored dvanaest predstavnika iz Tuzle, u navedenim projektnim aktivnostima učestvuje još ukupno sedamdeset i šest predstavnika iz sljedećih općina i gradova: Algemesi (Španija), Paredes (Portugal), Zola Predosa (Italija), Crespellano (Italija), Casalecchio di Reno (Italija) i Veseli nad Moravou (Republika Češka).

Članica naše Omladinske grupe Omladinskog resursnog centra, **Ermina Hadžikadunić** bila je dio ovog projekta.

► MEĐUNARODNA BIZNIS KONFERENCIJA PODIM

U Mariboru, Slovenija je održana je 35. po redu Međunarodna biznis konferencija PODIM, u periodu od 13. 5 – 14. 5.2015. g.

Cilj konferencije bio je ostvarivanje saradnje između start up projekata i velikih kompanija u cilju pomaganja mladim poduzetnicima u njihovim biznis počecima. Na konferenciji su prisustvovali i veliki broj ljudi iz svijeta biznisa koji su tu došli sa ciljem da ulože svoj novac u start up projekte.

Predstavljen je veliki broj start up projekata, među kojima je bio i projekat „Kimbyly protection“ kompanije čiji je PR bio naš član **Ismar Šahmanović**.

„Kimbyly protection“ je imao veliki uspjeh i uspjeli su ostvariti kontakte sa dva investitora, Franco Scolari, „Italian Angels“, Italija i Mike Edelhart, „Social Starts“, SAD, te smo takođe uspjeli ostvariti saradnju sa velikim brojem klijenata koji su zainteresovani za poslovnu saradnju u vidu reklamiranja na proizvodima „Kimbyly protection“ kompanije.



► CEO ACADEMY

U Sarajevu je, 23. 5.2015., održana „CEO“ akademija na kojoj je prisustvovao veliki broj start up projekata iz cijele Bosne i Hercegovine. Cilj akademije je bio predstavljanje start up projekata i dokazivanje da u Bosni i Hercegovini postoji veliki broj mladih ljudi koji su inovativni i koji mogu podići našu domovinu na viši nivo. Na akademiji su se predstavili start up projekti vezani za sport, medicinu, IT, internet, žurnalizam i mnoge druge sfere.

Jedan od start up projekata je bio i projekat „Kimbyly protection“ kompanije čiji je PR bio naš član Ismar Šahmanović.

✚ AKTIVNOSTI GRUPE

- U toku mjeseca maja održana su 3 sastanka na kojima su se grupi pridružile tri nove članice: Dženita Tosunbegović, Ivana Pejić i Jasmina Begović.

- Grupa u ovom trenutku provodi kampanju **#97961n**, koja će u toku mjeseca juna rezultirati flash mob-om na ulicama našeg grada.

- Članovi grupe planiraju obilježiti svjetski dan borbe protiv narkomanije sa nekoliko aktivnosti kroz online kampanju.

- Omladinska grupa ORC Tuzla aplicirala je na posljednji poziv Fondacije tuzlanske zajednice sa projektom „Živi zdrav život vol. 2“. Prisjećanja radi, „Živi zdrav život“ je bio projekat prvijenac Omladinske grupe, kad se radi o finansiranju iz budžeta donatora.

U toku mjeseca juna, također postoje naznake da će se ostvariti saradnja sa „JKP Panonica“ kako bismo na tom mjestu realizovali sportske i kulturne manifestacije.

Svim našim vršnjacima želimo srećan i uspješan ispitni rok!
#OGORCtim

REDOVNE AKTIVNOSTI:

Tokom maja smo u sklopu naših redovnih aktivnosti radili na održavanju i razvoju komunikacija i koordinacije unutar Omladinske mreže Bosne i Hercegovine (www.omladina-bih.net).

U okviru toga smo svakodnevno na mejling listu mreže (posta@omladina-bih.net), ali i na druge adrese u Bosni i Hercegovini i regiji distribuirali informacije interesantne za mlade i omladinski aktivizam u BiH (pozivi na radionice, seminare, konferencije, pozivi za projektne aplikacije, poslovi, školarine, ostale aktivnosti), održavali i redovno dopunjavali informacije na našoj web stranici www.omladina-bih.net, slali informacije koje smo dobili od omladinskih organizacija i pojedinaca iz mreže prema vani (međunarodnim organizacijama, organizacijama u regionu, donatorima), vršili korespondenciju sa organizacijama i pojedincima zainteresovanim za rad mreže, odgovarali na upite vezane za određene aktivnosti, edukacije i ostale informacije vezane za aktivizam mladih u BiH.

PLANOVI HCA/ORC-A ZA JUNI 2015.

- Sprovođenje redovnih aktivnosti kroz Omladinsku mrežu BIH
- Nastavak aktivnosti u okviru Prekogranične građanske mreže za mir, pomirenje i sigurnost ljudi na Balkanu - nastavak rada na istraživanju – organizovanje sastanka sa stejkholderima
- Početak aktivnosti u okviru koraka 7 (STEP 7) ALF BiH - godišnji sastanak članica ALF BiH

Više informacija na našoj web stranici:

www.omladina-bih.net

AKTIVNOSTI ČLANICA OMLADINSKE MREŽE BIH



OMLADINSKA ORGANIZACIJA "SVITAC"

Jusufa Čampare bb, 76 100 Brčko Distrikt

Tel./Fax: 049 211 032

Email: svitac@teol.net

Web: www.svitac.org

FB: www.facebook.com/omladinska.svitac

KREATIVNE RADIONICE

Omladinska organizacija Svitac je u maju nastavila sa svakodnevnim aktivnostima. Učesnici su podijeljeni u dvije grupe, uzrast 4-7 godina svakim danom od 11:00-13:00, a uzrast 8+ od 13:00-15:30 časova. Ovaj mjesec mala grupa je radila razne teme iz bojanki, a koje uključuju učenje i razlikovanje boja, oblika i ponavljanje brojeva od 1-10, proljetne teme, razne kolaže, prepoznavanje boja, čitanje priča, slušanje, a nakon toga mala diskusija odgovarajuća za uzrast. Poslepodnevna grupa je radila proljetne teme na kolaž papiru, crtanje i kreiranje pasoša kroz vježbanje engleskog jezika i ponavljanje osnova gramatike.



Kreativne radionice su ovaj mjesec posjetili članovi lokalnog tima Brčko ASuBIH (Asocijacija srednjoškolaca u Bosni i Hercegovini). Odlučili su da provedu jedan dan proljetnog raspusta i kvalitetno vrijeme sa mališanima učestvujući u raznim interaktivnim igrama i realizaciji aktivnosti za taj dan. Radionice se održavaju od ponedjeljka do petka u Omladinskom centru Brčko distrikt.



Koordinator radionica je Sanja Radovanović uz asistenciju EVS i Weltwaerts međunarodnih volontera Tamare Wonner i Nicolasa Zduna iz Njemačke, te Johna Streatfileda, Stephanie Burland i Isambarda Raynera iz Velike Britanije. Trenutno ima 45 učesnika.

MUZIČKE RADIONICE

- Radionice gitare

Učesnici radionice gitare nastavili su rad na etidama, minijaturama i duetima izabranim za njih u skladu sa njihovim mogućnostima i poznavanjem instrumenta.

- Radionice sambe

Učesnici radionice ovaj mjesec su osim rutinskog usviravanja uvježbavali kompoziciju koju je za grupu pripremio EVS volonter Isambard Reyner.

- Hip-Hop radionice

Učesnici hip-hop radionice motivirani su da osim pisanja tekstova na engleskom jeziku isprobaju svoje vještine i znanja na maternjem jeziku.

Osim gore navedenih radionica od sredine aprila pokrenuta je nova muzička radionica za djecu od 7-12 godina. Radionicu pripremaju i vode internacionalni i lokalni volonteri, a održava se svakog petka sa početkom u 14:00 časova. Serija radionica započela je upoznavanjem sa raznim vrstama instrumenata, nakon čega su učesnici isprobavali i prvi put se susretali sa nekim od instrumenata (gitara, bas gitara, flauta, trombon, truba, više vrsta udaraljki itd.). Radionice kulminiraju uvježbavanjem kraćih ritmičkih fraza na udaračkim instrumentima.

✚ JEZIČKE RADIONICE

Kursevi engleskog i njemačkog jezika su nastavljani u maju. 30 studenata trenutno pohađa ove kurseve i podijeljeni su u tri grupe (Početni 1, Početni 2 za djecu i odrasle i Srednji 1 za djecu). Svaka grupa ima dva časa sedmično u trajanju od sat i po, a časovi se održavaju u prostorijama Omladinske organizacije Svitac i Omladinskom centru Brčko distrikta. Starost studenata je od 8 do 35 godina.

- Radionica engleskog jezika „I love English”

Učesnici su i u maju nastavili sa diskusijama i pro/kontra argumentacijama na 4 do 6 teme koje bi zadao koordinator, te bi na taj način vježbali izgovor i neformalnu konverzaciju. Koordinator radionica je EVS međunarodni volonter iz Velike Britanije, John Streatfield. Radionice se održavaju ponedjeljkom i srijedom u terminu od 19:00-20:00 u Omladinskom centru Brčko distrikta. Trenutno ima 20 učesnika, uzrasta 15+.

- ŠTA IMA ?! (SPRECHEN-THEMEN- ARGUMENTIEREN) Radionice njemačkog jezika

Interaktivne radionice njemačkog jezika su i dalje rado posjećene i veoma dobro isplanirane, i za one koji zaista žele nešto da nauče od velike su koristi. Na radionicama ima trenutno 20 učesnika, uzrasta 18+. Radionice se održavaju u Omladinskom centru, ponedjeljkom i srijedom od 20:00-21:00 časova. Koordinator radionica su međunarodni volonteri iz Njemačke, Nicolas Zdun i Tamara Wonner. Nakon što je u aprilu započela saradnja između Omladinske organizacije Svitac i profesora njemačkog jezika JU Gimnazije „Vaso Pelagić“ Brčko distrikt, ova dva volontera su takođe učestvovali na DSD takmičenju poznavanja njemačkog jezika kao članovi žirija.

✚ SPORTSKE RADIONICE

Svakodnevne sportske radionice su u maju donijele mnogo zabave i radosti za manje učesnike. Broj učesnika varira i do 40, uzrasta 6+. Učesnici, posebno dječaci ali i djevojčice su oduševljeni sportskim radionicama, tako da se uvijek nađe dodatna zabava uz takmičarsku igru ili uživanje u timskim igrama. Koordinator sportskih radionica je Nicolas Zdun, međunarodni volonter iz Njemačke.

✚ EVS I „WELTWARTS“

U periodu januar 2014. – maj 2015. godine odobreni su grantovi za **24 EVS** (13 hosting i 11 sending) volontera za period od **01.04.2014. - 30.09.2016. godine**;

- 7 dugoročnih EVS projekata za volontere iz Velike Britanije, Njemačke i Holandije koji će provesti u Brčko distriktu po 12 mjeseci u periodu jun 2014. – septembar 2016.;
- dva kratkoročna EVS projekta za 6 volontera iz Velike Britanije koji će provesti u Brčko distriktu 3 mjeseca za vrijeme ljeta 2014. i 2015.;

- tri kratkoročna sending projekta za 6 volontera iz Bosne i Hercegovine koji su u avgustu 2014/2015. i aprilu 2015. volontirali mjesec dana u Holandiji;
- pet dugoročnih sending projekta za 5 volontera iz BiH (3 iz Brčkog i 1 iz Srebrenika i Sarajeva) koji će u Njemačkoj, Holandiji i Sloveniji volontirati 12 mjeseci u periodu april 2014. – septembar 2016.



„Weltwärts“ hosting program se takođe nastavio tokom 2015-e godine. Tamara Wonner, volonterka iz Njemačke, će u organizaciji volontirati do kraja avgusta 2015. godine, a onda će je zamijeniti nova volonterka iz Njemačke na period od 12 mjeseci.

✚ GRUPNI EVS 2015 - Proljetni EVS program 2015

Omladinska organizacija Svitac je poslala dva volontera na mjesec dana u partnersku organizaciju Don Bosco iz Rijswijka, Holandija, u periodu od 10. aprila do 10. maja 2015. godine kako bi učestvovali u EVS projektu „EVS Looking to Future (Springbos 2015)“. U projektu su učestvovali mladi ljudi iz Gruzije, Austrije, Italije, Španije, Mađarske, Švedske i Bosne. Ovaj projekat je imao za cilj da pomogne mladim ljudima da kroz kulturne aktivnosti razviju svoju kreativnost i samopouzdanje. Projekat je takođe promovisao podsticanje socijalne integracije i širenje perspektive mladih ljudi za zapošljavanje.

✚ Ljetni EVS program 2015

Krajem aprila 2015., organizacija Don Bosco iz Nizozemske je obavijestila Omladinsku organizaciju Svitac da je Grupni EVS projekat „**Around the world and Beyond**, (Ljetni EVS program 2015.) odobren od strane Holandske Nacionalne agencije. Grupni EVS će biti organizovan u Rijswijku i 12 organizacija iz 12 različitih država će učestvovati u ovom projektu. Svaka organizacija će poslati 2 volontera, starosti između 18 i 30 godina, ženskog i muškog pola, a bar jedno od njih mora biti osoba sa manje mogućnosti (nezaposlenost, društvene i ekonomske teškoće itd.) u Holandiju od 25. jula do 23. avgusta 2015. Tamo će ovih 24 mladih ljudi učestvovati u omladinskom radu i steći iskustva koja će kasnije primjenjivati u radu njihovih organizacija nakon svog povratka.

Ovaj projekat će biti realizovan u dva dijela:

- Unaprijed planirana posjeta (Advanced Planning Visit) koja je održana u Rijswijku, od 28. do 31. maja 2015. godine – za ljude koji upravljaju organizacijama/projektom).
- Grupni EVS 2015 – dva volontera po organizaciji će provesti mjesec dana u Holandiji radeći sa mladim ljudima tamo;

Svi mladi (18-30) koji su zainteresovani da apliciraju za ove volonterske pozicije za više informacija mogu kontaktirati Maju Tomić, na email: maja.evs@gmail.com

SARADNJA SA ŠKOLAMA

Međunarodni volonteri iz Njemačke Omladinske organizacije Svitac Tamara Wonner i Nicolas Zdun su u maju posjetili JU Poljoprivrednu i Medicinsku školu Brčko distrikt i učestvovali na interaktivnoj radionici njemačkog jezika na temu obrazovanje u BiH i Njemačkoj.



FUTURESHORTS FILM FESTIVAL

Pripreme za festival kratkog filma („FutureShorts Film Festival“) započete u aprilu nastavljene su u prvoj polovini maja. U petak 15.05. u 19:30 časova u Omladinskom centru publika u Brčkom imala je priliku da pogleda sedam kratkih filmova iz više zemalja u sklopu proljetne sezone. U program su uvršteni filmovi različitih žanrova.

Ovo je bio deveti FutureShorts Film Festival u Brčkom i kao takav jedinstven je u BiH. Filmovi prikazani u Brčkom gledala je publika na prestižnim festivalima u preko 300 gradova i 90 zemalja. Neki od festivala su: *Sundance, Berlinale, Barcelona Visual Sound, Glasgow Film Festival...*

Neki od filmova nominirani su na festivalima ili su dobitnici nagrada: *BAFTA Film Award, French Film Industry Awards, Hong-Kong IFF- Firebird Award...*



Jedan od bitnih aspekata ovog festivala je taj da gledaoci biraju film koji im se najviše dopada putem glasanja. U Brčkom je najviše glasova dobio kratki animirani film „The Missing Scarf“ irskog režisera Eion-a Duffy-a.

Za jun se planira nastavak svih redovnih radionica Omladinske organizacije Svitac i dolazak 3 nova EVS volontera koji će u Omladinskoj organizaciji Svitac boraviti 3 mjeseca.



VIJEĆE MLADIH OPĆINE TOMISLAVGRAD

Letka b.b., 80 240 Tomislavgrad

Tel.: 034 356 440, fax: 034 356 444

E-mail: vijecemladih.tg@gmail.com

+ ODRŽANA RADIONICA ZA MLADE O CIVILNOM DRUŠTVU

Radionica za mlade na temu „Civilno društvo“ održana je u srijedu, 13. svibnja u zgradi Općine Tomislavgrad. Ovo je prva u nizu radionica na različite teme za mlade u sklopu projekta "Afirmacija mladih u lokalnoj zajednici" koju provodi udruga mladih sa područja općine Tomislavgrad i Vijeće mladih općine Tomislavgrad u suradnji s njemačkom fondacijom Schuler Helfen Leben.

Cilj ovog projekta je jačanje kapaciteta mladih za njihovo aktivno sudjelovanje u lokalnoj zajednici i promocija društvenog aktivizma mladih na području općine Tomislavgrad.



Polaznici su kroz ovu radionicu imali priliku upoznati se s pojmom civilnog društva, suradnjom s nevladinim organizacijama, o stanju nevladinog sektora u općini Tomislavgrad, Sporazumu između Općinskog vijeća, Općinskog načelnika i nevladinih organizacija sa područja općine Tomislavgrad, osnivanju nevladine organizacije i njezinom financiranju, broju i aktivnostima nevladinih organizacija na području općine Tomislavgrad, drugim oblicima građanskog aktivizma, kao i o sektorskim partnerstvima i umrežavanjima organizacija civilnog društva. Na radionici je bilo nazočno 24-oro mladih ljudi, većinom srednjoškolaca, koji su izrazili svoje zadovoljstvo prezentiranim.

+ DEFINIRANJE POTREBA MLADIH U LOKALNOJ ZAJEDNICI I UTVRĐIVANJE PRIORITETA MEĐU NJIMA

U ponedjeljak, 18. svibnja u vijećnici Općinskog vijeća Tomislavgrad održana je druga radionica za mlade na temu "Definiranje potreba mladih u lokalnoj zajednici i utvrđivanje prioriteta među njima". Polaznici su kroz ovu radionicu imali priliku upoznati se s time tko su mladi, koliki je udio mladih u ukupnoj populaciji u BiH, a koliki u glasačkom tijelu, o položaju mladih u BiH, obrazovanju i obuci za mlade, cjeloživotnom obrazovanju, zapošljavanju i poduzetništvu, zdravlju i kvaliteti života, društvenoj uključenosti i sudjelovanju mladih, volonterskim aktivnostima, Zakonu o mladima FBiH, o stanju na terenu s osvrtom na mehanizme za mlade u lokalnoj zajednici u kojoj žive, Strategiji za mlade, proračunu za mlade, kao i o Vijeću mladih i institucionalnom sudjelovanju i dr. Na radionici je bilo nazočno 20 mladih ljudi, većinom srednjoškolaca, koji su izrazili svoje zadovoljstvo prezentiranim.



Ovo je druga u nizu radionica na različite teme za mlade u sklopu projekta "Afirmacija mladih u lokalnoj zajednici" koju provodi udruga mladih sa područja općine Tomislavgrad i Vijeće mladih općine Tomislavgrad u suradnji s njemačkom fondacijom Schuler Helfen Leben.

Više na našoj web stranici: www.vijecemladih-tg.com



www.pronibrcko.ba

PRONI Centar za omladinski razvoj
Mehmedagića 24, 76 100 Brčko distrikt BiH
Tel./Fax: 00 387 49 217 695
E-mail: pronibrcko@teol.net
www.pronibrcko.ba

PRONI PODRŽAVA KREIRANJE NOVE OMLADINSKE POLITIKE REPUBLIKE SRPSKE

Kao jedna od vodećih organizacija u radu s mladima, PRONI Centar se odazvao na poziv Ministarstva porodice omladine i sporta Republike Srpske na konferenciju „Dijalog s mladima“. Poznavajući važnost i ulogu strateških dokumenata za mlade PRONI je 26 i 27. 5. 2015. bio učesnik na „Dijalogu za mlade“ kako bi dao svoj doprinos u izradi nove Omladinske politike u RS.



Cilj konferencije je bio da se otvori dijalog između mladih i svih relevantnih aktera koji se bave pitanjima mladih kako bi se utvrdili prioriteti za poboljšanje položaja mladih na osnovu kojih će biti izrađen dokument Omladinska politika Republike Srpske (2016-2020). Konferencija je okupila oko 70 učesnika, predstavnika ministarstava u Vladi Republike Srpske, omladinskih organizacija, savjeta učenika, jedinica lokalne samouprave, međunarodnih organizacija i drugih ključnih aktera.

Tokom konferencije prezentovani su rezultati istraživanja o potrebama mladih u Republici Srpskoj dobijeni anketiranjem preko 2066 mladih ljudi iz različitih jedinica lokalne samouprave Republike Srpske. Učesnici konferencije, među kojima je bila i volonterka PRONI Bijeljine, Tatjana Jeftić, su radili na kreiranju vizije Omladinske politike Republike Srpske za 2020. godinu, a utvrđeni su i prioriteti od značaja za mlade: unaprijediti zapošljivost mladih, razviti zdrave stilove života, unaprijediti mogućnosti za kvalitetno provođenje slobodnog vremena i aktivno učešće mladih i podrška izvrsnosti i osjetljivim grupama mladih.



Nakon konferencije će biti kreirane radne grupe sastavljene od svih zainteresovanih aktera koji će raditi na daljoj izradi dokumenta, a šira javnost će imati priliku da se uključi u ovaj proces tokom regionalnih konsultacija koje će biti organizovane nakon izrade prednacrtu dokumenta, izjavila pomoćnica ministra za omladinu Branka Malešević.

PRONI Centar kao članica Omladinskog savjeta Bijeljina i članica skupštine Omladinskog savjeta Republike Srpske će se i dalje zalagati da pitanja mladih u strateškim dokumentima budu dobro predstavljena, te kreirane konkretne mjere za rješavanje pitanja mladih.

DRUGA EUROPSKA KONVENCIJA O OMLADINSKOM RADU

Od 27.- 30. 4. 2015. u Briselu je u organizaciji Vijeća Europe održana Europska konvencija o omladinskom radu #ECYW2015. Druga ovakva konvencija je na jednom mjestu okupila 400 omladinskih radnika, istraživača, praktičara omladinskog rada, donosioce odluka iz 47 različitih zemalja da zajednički kreiraju konvenciju o omladinskom radu.

Kroz skup je došlo do razmjene ideja, iskustava, prilika i izazova za rad s mladima danas u Europi, ali i za rad u ovom sektoru. Razgovaralo o tome koji su standardi i kvaliteta omladinskog rada, što je to i čemu služi danas omladinski rad, tko se omladinskim radom bavi i na koji način.



Delegacije od 6 do 8 članova na konvenciji su predstavljale zemlje potpisnice Europske kulturne konvencije Vijeća Europe među kojima je i Bosna i Hercegovina. Bosanskohercegovačku delegaciju su pored predstavnika Ministarstva civilnih poslova BiH, Federalnog ministarstva sporta i kulture, Ministarstva porodice omladine i sporta Republike Srpske, predstavnici omladinskih organizacija i organizacija za mlade u BiH, među kojima je PRONI Centar za omladinski razvoj.

Učesnici/ce su imali priliku sudjelovati u 68 različitih radionica, predavanja i panel diskusija sa ciljem razmjene iskustva, ideja i strategija u promicanju omladinskog rada u Europi. Na Konvenciji se govorilo o ulozi omladinskog rada za razvoj mladih i njihovih vještina za konkurentnije tržište rada, ali i konkretan doprinos za osobni razvoj svake mlade osobe, razvoja aktivnih građana i građanki, solidarnosti i neformalnog obrazovanja. Naš Generalni menadžer, Jasmin Jašarević je posebno dao doprinos na radionicama o osiguranja kvaliteta omladinskog rada u Europi danas.

Rezultati konvencije će u svim zemljama biti korišteni za politički dijalog s ciljem unaprjeđenja omladinskog rada u svim pojedinačnim članicama ali zajedničkom razvoju na europskom nivou. Konvencija je rezultirala i drugom deklaracijom o omladinskom radu [Making World of Difference](#).

SARAJEVO: KONFERENCIJA “PRAVDA ZA SVAKO DIJETE”

U Sarajevu se održava konferencija o temi “Pravda za svako dijete” čiji je cilj osnaživanje prava djece u pravosudnom sistemu kroz pregled dosadašnjeg napretka i pronalaženje mogućih rješenja za ostale izazove.

Konferencija je okupila predstavnike pravosudnog sistema, ministarstava i drugih donosilaca odluka na raznim nivoima, kako bi zajednički došli do što kvalitetnijih rješenja i preporuka. Između ostalih, učestvovali su i predstavnici PRONI-a.

“UNICEF s velikom predanošću radi na zagovaranju i promoviranju pravde za svako dijete. Odgovornost za tu oblast nije samo na jednom ministarstvu ili tijelu, potreban je intersektorski pristup i zajedničko djelovanje”, rekao je predstavnik UNICEF-a za Bosnu i Hercegovinu Ayman Abulaban.



On je izrazio uvjerenje da će naponi ove konferencije postati stvarnost za svu djecu u Bosni i Hercegovini, što će rezultirati time da koncept pravde za svako dijete u najboljoj mjeri bude prepoznat i shvaćen od svih. Abulaban je ukazao na važnost ranog otkrivanja rizičnog ponašanja i prevencije, saopćio je tim „ZaSvakoDijete.ba“.



FONDACIJA ZA DRUŠTVENO-EKONOMSKI RAZVOJ 787

Gornja Breka 69, 71 000 Sarajevo

Tel./fax: 061 572 991

E-mail: info@fondacija787.ba; dajana.dzindo@fondacija787.ba

Web: www.fondacija787.ba;

FB: www.facebook.com/fondacija787

✚ FONDACIJA 787 NASTAVILA SA SERIJALOM OBUKA O OSNOVNIM POSLOVNIM VJEŠTINAMA

Nakon niza obuka organizovanih u martu mjesecu, Fondacija 787 je i maju održala dvije obuke za mlade i žene fokusirane na profesionalno usavršavanje.

Besplatne obuke pod nazivom “Umrežavanje - Prvi korak prema poslovnom uspjehu” imale su za cilj upoznati učesnike sa konceptom poslovnog umrežavanja, te predstaviti pravila i praktične savjete koji će im omogućiti da i sami savladaju ovu vještinu.

Upravo ova tema je izabrana u sklopu serijala osnovnih poslovnih vještina, jer se stvaranje i održavanje kvalitetne poslovne mreže smatra jednim od osnovnih koraka koje je neophodno poduzeti ka ostvarenju uspješne poslovne/poduzetničke karijere.

Radi se o aktivnosti koja je jednako bitna i za mlade osobe koje tek ulaze u poslovne vode, kao i za one koji dugu niz godina djeluju u poslovnom svijetu, budući da se na taj način najučinkovitije susreću potencijalni poslodavci, klijenti, partneri i ostali kontakti, a koji su neophodni za dalji profesionalni razvoj.

Učesnici su stoga u sklopu organizovanih obuka, između ostalog, imali priliku saznati više o samom konceptu, procesu i strategijama umrežavanja sa teorijskog stajališta, po prvi put čuti i analizirati dobre primjere umrežavanja, te biti dijelom interaktivnih zadataka u sklopu kojih su dobiti povratnu informaciju u vezi sa vlastitim vještinama umrežavanja.

Više informacija na:
www.fondacija787.ba





UDRUŽENJE „NOVA ŽENSKA INICIJATIVA“

Bosne Srebrene 12/2, 75 000 Tuzla

Tel.: 061 859 080

E-mail: novazenskainicijativa@gmail.com;

Web: www.novazenskainicijativa.com

✚ IZLOŽBA UMJETNINA U TUZLI

Udruženje „Nova ženska inicijativa“ iz Tuzle i JU BKC TK Tuzla, dana 21. maja bili su domaćini Udruženju žena „Gračaničko keranje“, te je tom prilikom održana i jednodnevna izložba umjetnina pod nazivom „Veče gračaničkog keranja u Tuzli“.

Vrijedne članice Udruženja ponudile su tuzlanskoj publici samo mali dio iz svoje bogate kolekcije ručnih radova, a kako je to vez koji se tradicionalno veze samo u Gračanici i umijeće i tehnika veza se prenose sa koljena na koljeno. Vez - kera je umjetnički rad, veoma zahtjevan i veoma skup.



Zahvaljujući članicama Udruženja „Gračaničko keranje“, ovaj vez je geografski zaštićen, a zahvaljujući nizu izložaba koje je udruženje organiziralo stigao je u domove diljem svijeta i vrlo je često izlagan na Međunarodnim sajmovima. U ceremoniji otvaranja izložbe publici su predstavljena dva ženska udruženja, „NŽI“ iz Tuzle i UŽ „Gračaničko keranje“ iz Gračanice, koja su najavila svoju dalju suradnju i umrežavanje sa drugim ženskim udruženjima. Ansambl BKC-a „ISKRE“ svojom pjesmom je uljepšao ovaj događaj.

✚ TUZLA – KAPIJA – 25. MAJ

Tišina, tuga, bol 25. maja osjetila se na svakom centimetru Tuzle. Polaganjem cvijeća i vijenaca na spomen-obilježju Slana Banja, te ispred spomenika na Kapiji i odavanjem počasti ubijenoj mladosti, obilježen je na dostojanstven način, Dan sjećanja na žrtve tragedije na Kapiji, poznat kao Dan prekinute mladosti u Tuzli.

Vijence na spomen-groblju i na Kapiji položile su i članice udruženja „Nova ženska inicijativa“.



✚ PLANIRANE AKTIVNOSTI ZA JUNI:

- 3. juni – Otvorenje Dnevne bolnice Klinike za infektivne bolesti UKC-a Tuzla koju je opremilo i uredilo Udruženje „Nova ženska inicijativa“ ,

- 4. juni – Proslava mature u Centru za djecu sa posebnim potrebama u Tuzli u organizaciji Udruženja NŽI.



FONDACIJA BORIS DIVKOVIĆ
Branilaca Sarajeva 5/1, 71 000 Sarajevo
Tel.: 063 898 979
E-mail: office@bdf.ba
Web: <http://bdf.ba/>

+ DANI OTVORENIH VRATA FONDACIJE BORIS DIVKOVIĆ, MAJ 2015.

Fondacija Boris Divković je u sklopu *Dana otvorenih vrata* organizovala tri panel-diskusije koje su tematizirale relevantna pitanja bh. političkog života nedovoljno zastupljenih u javnom prostoru. Cilj diskusija je bio doprinos jačanju odgovorne politike koja uzima u obzir različite aspekte društva kao što su politička participacija, naročito nezastupljenih skupina društva kao što su mladi i žene, utjecaj religije na politiku, obrazovanje i ljudska prava. U sklopu Dana otvorenih vrata održane su sljedeće diskusije:

► KAKO MIJENJAMO LOKALNU SAMOUPRAVU?- utorak, 5. maj 2015., 18h, Muzej književnosti, Ul. Sime Milutinovića Sarajlje 7, Sarajevo

Učesnici/e su razgovarali/e o značaju lokalne samouprave i rada općinskog i gradskog vijeća te nezastupljenosti u javnom prostoru. Takođe, bitna pažnja je posvećena odnosu između općina i grada, pozicije i opozicije na razini lokalne samouprave, potencijalima za direktno djelovanje građana/ki te mogućnostima zajedničkih inicijativa, saradnje kantonalnih, gradskih i općinskih vlasti te raspodjeli sredstava i javnim raspravama. Učesnici/a diskusije: Sanja Lazar, vijećnica u Općinskom vijeću Novo Sarajevo i Gradskom vijeću Grada Sarajeva, Vitor Handžić, vijećnik u Općinskom vijeću Stari Grad i Gradskom vijeću Grada Sarajeva i Miroslav Živanović, vijećnik u Općinskom vijeću Novo Sarajevo i Gradskom vijeću Grada Sarajeva. Moderator: Nedim Jahić



► ODGOVORNI MEDIJI – POLITIČARKE U MEDIJIMA . srijeda, 6. maj 2015., 18h, Muzej književnosti



Učesnici/e su razgovarali/e o zastupljenosti političarki u medijima, o načinu na koji se o političarkama govori prije, poslije i za vrijeme izbornih kampanja te o (ne)postojanju rodno-osjetljive politike u BiH. Učesnici/e: Nataša Briški, novinarka i PR konsultantica (Slovenija), Vildana Bešlija, vijećnica u Općinskom vijeću Novo Sarajevo, Masha Durkalić, novinarka, Nerina Čevra, Predstavništvo Westminster Fondacije za demokratiju u BiH, Fedžad Forto, Fena
Moderatorica: Arijana Aganović

► SEKULARIZAM I VJERSKE SLOBODE – POLITIČKI I DRUŠTVENI ASPEKTI - Petak, 8. maj 2015, 17h

Učesnici/e su razgovarali/e o utjecaju religije na politiku i društvo, o odnosu vjerskog i građanskog, koliko su religija i vjerske zajednice relevantne za bh. politički život i različite segmente bh. društva kao što su obrazovanje i umjetnost. Učesnici/e: Ivan Šarčević, Đermana Šeta, Zlatiborka Popov-Momčinović i Bojan Stojčić. Moderator: Dennis Gratz



H.O. Muslimansko dobrotvorno društvo - MERHAMET DOBOJ
Kralja Aleksandra 17, 74 000 Doboje
Tel./fax: 053 226 886
E-mail: merhamet.doboj@cutuk.net
Web: www.ngo.ba; www.facebook.com/Merhamet-Doboj

✚ AKTIVNOSTI H.O. „MERHAMETA“ DOBOJ U MAJU

- Posjeta predstavnika SFOR-a - Poljski bataljon - H.O. „Merhamet-u“ Doboje;
- Posjeta predstavnice OSCE-a Doboje, Brankice Tešanović - H.O. „Merhamet-u“ Doboje;
- Volonteri „Merhameta“ Doboje učestvovali u obilježavanju „DANA EVROPE 2015“ koji je održan u bivšem domu vojske u Doboju - 8.5. 2015. godine;
- Posjeta Predsjednika „Merhameta“ Švedske, gospodina Fehima Halilovića - H.O. „Merhametu“



- Predstavnik OSCE-a Doboje, Tanja Danilović i predstavnice „Merhameta“ i NVO „Šesto čulo“, Amra Mišić i Elvisa Mahmutović koje su ujedno i članice Koalicije „Tolerantno i pozitivno iz Doboja“ su prisustvovala obilježavanju „Svjetskog dana MUKOPOLISAHARIDOZE“ - 15. 5. 2015. godine. Ova rijetka bolest se javlja na jedno od 100 000 rođene djece! Na području RS-a je troje djece. Podrška Udruženju oboljelih od ove rijetke bolesti koje je osnovano 2010. godine u Doboju.

- Volonterke „Merhameta“ Doboje, Mirnesa Bećirodobašić i Amra Mišić prisustvovala obilježavanju „15. maja - Međunarodnog dana porodice“ u organizaciji „Udruženja za pomoć djeci sa posebnim potrebama Doboje“, pod pokroviteljstvom Grada Doboja i „Ministarstva porodice, omladine i sporta RS“.

- Volonterka „Merhameta“ Doboje, Mirnesa Bećirodobašić učestvovala na javnoj diskusiji po nazivom „Mladi i korupcija“ koja je održana u Doboju, 19. maja 2015. godine u prostorijama UG. ToPeeR-a u organizaciji „Antikorupcijske mreže u BiH – ACCOUNT“ i „Omladinskog centra Trebinje“.

- Predsjednica „Merhameta“ Doboje, Avdić Faketa prisustvovala Savjetovanju u organizaciji Gender centra RS posvećeno rodno odgovornom budžetiranju na lokalnom nivou vlasti koje je održano u Administrativnom centru Vlade RS u Banja Luci -20. 5. 2015. godine.





- Volonterka „Merhameta“ Dobo, Amra Mišić prisustvovala okruglom stolu „Obrazovanje za mir u tranzicionim društvima“ koji je održan u bivšem domu vojske u Doboju - 21. 5. 2015. godine. Na okruglom stolu učestvovali su predstavnici/ce lokalnih vlasti, civilnog društva, medija, obrazovnih institucija, vjerskih zajednica i poslovnog sektora iz grada Doboja i općine Maglaj. Moderatori okruglog stola bili su Vehid Šehić, Forum građana Tuzla (partner u okviru projekta PRO-Budućnost) i prof. dr. Nerzuk Ćurak (dio ekspertnog tima projekta).

- Volonterka „Merhameta“ Dobo, Amra Mišić prisustvovala predavanju o istraživačkom radu Jasne Ćirić, predsjednice Jevrejske opštine Niš koje je održano u Jevrejskom kulturnom centru u Doboju - 25. 5. 2015. godine. Predavanje pod nazivom „Tako ja radim“ je predavanje o istraživačkom radu Jasne Ćirić, a istraživanja su vezana za mjesta u Srbiji (Niš, Jagodina, Pirot, Kragujevac, Novi Pazar, Smederevo i dr.), Bosni i Hercegovini i Republici Srpskoj (Zvornik, Vlasenica, Rogatica, Višegrad, Bijeljina, Tuzla i dr.), gdje poslije II Svjetskog rata skoro da nema ili nema Jevreja. Film „Priča o porodici Mandilj“ govori o stradanjima porodice Mandilj iz Niša, kao i ispovijest Đilde Mandil Kabiljo, koja je uspjela sa majkom da preživi ratne strahote. Preživjela je tako što je otac dan pred odvođenje na streljanje dao fiktivni razvod njenoj majci, on je odveden na streljanje, a fiktivni razvod je majci i Đildi bio karta za život.



- Predsjednica „Merhameta“ Dobo, Avdić Faketa i volonterka Amra Mišić prisustvovala naučnoj konferenciji „Živjeti sa poplavama“ koja je održana u Doboju, u hotelu Integra - 26. maja 2015. godine sa dvostrukim fokusom: na prijedlog mjera sprečavanja posljedica elementarnih nepogoda i implementaciji zakona iz ove oblasti.



- Podjela humanitarne pomoći za članove „Merhameta“ Dobo - 30. 5. 2015. godine.



INSTITUT ZA RAZVOJ MLADIH KULT

Ul. 4. viteške brigade 34-36 BA, 71 210 Ilidža, Sarajevo

E-mail: kult@mladi.org

Tel.: 033 778 778; fax: 033 778 779

Web: www.mladi.org

+ SVE BLIŽE STRATEGIJI PREMA MLADIMA U FBiH

Mladima u Federaciji BiH trebaju bolja zakonska rješenja, treba ih bolje informisati i treba za njih izdvajati više budžetskih sredstava u svim oblastima. Ovo su samo neki od zaključaka dvodnevnog dijaloga „Strategija prema mladima u FBiH“ koji je održan između predstavnika Radne grupe za izradu Strategije prema mladima FBiH i predstavnika oko 80 nevladinih organizacija koje se bave mladima, omladinskih udruženja i vijeća mladih. Zaključci sa ovog dijaloga biće korišteni kako bi se kreirala prva Strategija prema mladima u FBiH. Organizatori događaja „Dijalog: Strategija prema mladima FBiH“ jako su, tvrde, zadovoljni urađenim. *„Posebno nam je drago što mladi učestvuju u kreiranju prvog strateškog dokumenta koji im je namijenjen. Na osnovu ovih zaključaka, kreirat će se, nadamo se do kraja ove godine, prva Strategija prema mladima u FBiH“* – istakla je Katarina Vučković iz Instituta za razvoj mladih KULT.



Usvajanje Strategije prema mladima, na svim nivoima u Federaciji, uslovljeno je Zakonom o mladima FBiH čije je donošenje inicirao Institut za razvoj mladih KULT i koji je usvojen u junu 2010. godine. Proces izrade Strategije prema mladima koordinira Federalno ministarstvo kulture i sporta, a Institut za razvoj mladih KULT je, odlukom Vlade FBiH, imenovan za pružanje stručno – konsultativne podrške u tom procesu.

+ POBOLJŠATI POLOŽAJ MLADIH U USK

Jasmin Bešić, izvršni direktor Instituta za razvoj mladih KULT sastao se sa predstavnicima vlasti Unsko-sanskog kantona, sve sa ciljem da se zajedničkim djelovanjem vladinog i nevladinog sektora poboljša položaj mladih u tom kantonu.

Sastanci su obavljani sa gosp. Izudinom Saračevićem, premijerom USK, sa gosp. Edinom Behrićem, načelnikom Općine Velika Kladaša, te sa gosp. Damirom Hodžićem i gospodinom



Kenanom Keserovićem, predsjedavajućim i zamjenikom predsjedavajućeg Komisije za obrazovanje, nauku, kulturu, sport i mlade pri Skupštini USK. Razgovor je vođen o načinima putem kojih se može poboljšati položaj mladih u ovom kantonu.

Jasmin Bešić, izvršni direktor Instituta je istaknuo vidove podrške koju Institut može pružiti Vladi USK-a. „Naša misija je da pružimo stručnu podršku institucijama vlasti da bi vlasti mogle pomoći mladima“. Dodao je da je Institut spreman pomoći i u obučavanju osoba koje će činiti radnu grupu za izradu strategije, koja je obaveza svih kantona. Predstavnici vlasti u USK su naglasili da su spremni za donošenje strategije prema mladima, ali i za druge načine koji će pomoći mladim ljudima.

POČELO ISTRAŽIVANJE O BUDŽETSKIM POTICAJIMA BH. PRIVREDI

Institut za razvoj mladih KULT, u okviru inicijative „Poslovni prostor BH“, započeo je istraživanje o raspodjeli budžetskih poticaja za razvoj privrede u Bosni i Hercegovini. Cilj je da se analizira stanje u oblasti finansijske podrške privredi od strane institucija vlasti i kreiranje smjernica za usmjerenu podršku perspektivnim granama privrede.

Istraživanje se odnosi na budžetsku podršku privredi koju su institucije vlasti na svim nivoima pružale u 2013. i 2014. godini, u vidu bespovratnih (grant) i povratnih (kreditnih) sredstava. Upitnik o poticajima za razvoj privrede dostavljen je krajem aprila na adrese više od 250 institucija vlasti u BiH: svim općinama u BiH, kantonalnim, entitetskim i državnim ministarstvima koji u svom djelokrugu imaju privredu, službama za zapošljavanje, razvojnim bankama, pojedinim agencijama i dr.

U BOSNI I HERCEGOVINI USPOSTAVLJENA ČETIRI ONLINE UMiD (UČI, MISLI I DJELUJ) CENTRA

U Jablanici, Sarajevu, Srebrenici i Velikoj Kladaši otvoreni su online UMiD centri. Institut za razvoj mladih KULT javnim pozivom pozvao je omladinske organizacije iz cijele BiH da apliciraju i tako postanu jedan od četiri regionalna online UMiD centra u BiH.

U konačnici, izabrani su OK „Pod istim suncem“ iz Jablanice, Udruženje „Nautilus“ iz Sarajeva, Udruženje „Prijatelji Srebrenice“ iz Srebrenice, te Demokratska organizacija mladih iz Velike Kladaše. UMiD obuka do sada je obavljena 11 puta u učioničkoj verziji, te je, zbog velikog interesa mladih, odlučeno da obuka postane dostupna i u online verziji – tvrde iz Instituta za razvoj mladih KULT.

„Krajem juna, u sva četiri regionalna centra, organizirat ćemo regionalne konferencije kojima će prisustvovati oko četiri stotine mladih koji će biti prvi polaznici/e ove obuke“ – istako je Jasmin Bešić, izvršni direktor Instituta za razvoj mladih KULT. Na kraju, dodao je da će svi mladi koji uspješno završe obuku dobiti certifikat. Još važnije, tvrdi, dobit će praktična znanja i vještine koje će u budućnosti moći iskoristiti u poslovnom svijetu.

VEDRANA SEKSAN: KADA POKUCATE NA STOTINE VRATA, JEDNA ĆE SE OTVORITI

„Kada sam diplomirala, dugo nisam mogla naći posao. Nije me to obeshrabilo. Nisam čekala konkurse, kucala sam na sva vrata. Dok se, napokon, jedna nisu otvorila.“ Vedrana Seksan, bosanskohercegovačka glumica i kolumnistica bila je gošća sesije Kafa sa.. u Spjaljici.

Govorila je o svojim uspjesima ali i neuspjesima, o porodici i o poslu. Kaže, kada nešto dovoljno želiš, sve se može uskladiti i stići. Opušteno ali i edukativno druženje trajalo je dva sata.



Goste Spajalice zanimalo je koje su Vedranine najdraže uloge, koliko je za nju značila prva velika uloga? Kako stiže balansirati između porodice, majčinstva, glume, pisanja i volonterskog rada? „Volim svoju porodicu – supruga i djecu. Jako volim i svoj posao. Sve se može stići i u svemu možeš biti dobar“ – istakla je Vedrana Seksan.

ONLINE AKTIVIZAM – ZNAMO KAKO DONIJETI PROMJENE

Moguće je „online“ boriti se za promjene! Online aktivizmom mladi ljudi mogu direktno i indirektno doprinijeti svojoj lokalnoj zajednici, ali i šire, promovišući i zalažući se za ideje i aktivnosti koje će imati pozitivan ishod.

Promotivnom akcijom „Online aktivizam za početnike“, predstavnici Instituta za razvoj mladih KULT, upoznali su danas građane Sarajeva sa internetskim alatima kojima se mogu postići društvene promjene. Podijeljeno je oko 500 brošura u kojima je ukazano na prednosti korištenja interneta u aktivizmu. U brošuri je prikazano više od 10 online alata sa detaljnim uputstvima - kako, kada, gdje i u koje svrhe ih koristiti.

„Uz pomoć jednostavnih alata na internetu možete sami napraviti web-stranicu, osnovati stranicu na Facebooku i nalog na Twitteru, snimiti video i lako ga montirati, organizirati uživo prijenose događaja.

Možete organizirati online peticiju, sakupljati novac za novu ideju, predstaviti istraživanje i pisati o tome na blogu.

Sve ove platforme možete povezivati jednu s drugom – objasnila je Mirela Ajanović, voditeljica projekta UMiD online u Institutu za razvoj mladih KULT.



Dodala je da su ovo samo alati koji mogu olakšati mnoge stvari, ali da pravu promjenu donose upravo građani i to svojim aktivnostima.

„Raduje nas da su građani Sarajeva, posebno mladi, bili zaista zainteresovani da čuju ono što smo željeli reći. Drago nam je da su mladi s nama podijelili pozitivna iskustva i da se neki od njih već dobro koriste online alatima i da su već dobri aktivisti – zaključila je Ajanović. Inicijativa je podržana od strane UNDEF-a.

NOVI ČLANOVI



CENTAR ZA EDUKACIJU MLADIH

Mali trg bb, 72 270 Travnik

Tel./fax: 030 511 565

E-mail: cem@bih.net.ba

Web: www.cem.ba

UKRATKO O CEM-U

Centar za edukaciju mladih (CEM) najaktivnija je nevladina organizacija na području Srednjobosanskog kantona, osnovana 1998. godine, sa sjedištem u Travniku. Sa svojim sedamnaestogodišnjim radnim iskustvom, zasnovanom na evropskim standardima i zdravim životnim stilovima kroz vlastite programe i aktivnosti, CEM osnažuje pojedince, organizacije civilnog društva, javne ustanove i donosiocice odluka, te aktivno zagovara kreiranje i implementaciju politika koje štite prava mladih, žena i djece.

Centar za edukaciju mladih zapošljava obrazovane ljude sa stručnim znanjima iz oblasti rada s mladima, sistemskog planiranja, projektnog menadžmenta, marketinga, finansija i drugih. Također, CEM koristi i vanjske stručne saradnike, kako bi izgradio tim koji radi na ispunjenju vizije i misije organizacije, kao i njenih strateških pravaca. Danas, Organizacija broji 5 zaposlenih, 20 aktivnih volontera, 816 registrovanih članova i veći broj stručnih saradnika iz raznih oblasti. Naši programi na godišnjem nivou uključuju, direktno, oko 1.500 mladih ljudi, dok broj indirektnih korisnika prelazi brojku od 10.000 godišnje.

OMLADINSKI RAD

Omladinski rad predstavlja aktivnosti namijenjene mladima, bilo da su one obrazovne, socijalne, kulturne, ili političke prirode, mada se, u nekim slučajevima, sport i pružanje usluga mladima ubrajaju u omladinski rad. Njegov osnovni cilj je pružanje mogućnosti mladima da oblikuju svoju budućnost. Primarno, omladinski rad pripada vanškolskom obrazovnom sistemu (neformalno i informalno obrazovanje). Također, ciljevi omladinskog rada su i integracija i inkluzija mladih u društvo. Stoga, omladinski rad uključuje aspekte obrazovanja, zapošljavanja, pružanje podrške i facilitacija razvoja, stambena pitanja, mobilnost, zdravlje kao i ostale više tradicionalne aspekte poput; učešća, omladinske politike, kulturnih aktivnosti, profesionalno usmjeravanje, slobodno vrijeme i sport. Omladinski rad uvijek teži da dosegne mlade koji žive na margini društva. Ono što je specifično za CEM jeste to da većina zaposlenih posjeduje certifikate Univerziteta u Jönköpingu (Švedska) – „School of Education and Communication“ i Univerziteta u Zenici – Pedagoškog fakulteta za program „Liderstvo i razvojni omladinski rad u zajednici A i B nivo“, što Centar za edukaciju mladih čini jednom od rijetkih organizacija koje posjeduju profesionalno obučeni kadar za rad sa mladim ljudima.

Kvalitetan rad naše organizacije tokom njenog djelovanja prepoznale su i podržale različite domaće i internacionalne agencije i donatori, kao što su: Švedska internacionalna razvojna agencija – SIDA, IOGT International, Razvojni program Ujedinjenih naroda/nacija – UNDP BiH, Balkan Trust for Democracy - BTM, Centar za promociju civilnog društva – CPCD, Centri civilnih inicijativa kroz USAID program, Američka ambasada i mnoge druge.

KONTAKT OSOBE:

- Adis Arnautović, direktor

- Nedim Pripoljac, program menadžer



UDRUŽENJE „NOVA ŽENSKA INICIJATIVA“

Bosne Srebrene 12/2, 75 000 Tuzla

Tel.: 061 859 080

E-mail: novazenskainicijativa@gmail.com;

Web: www.novazenskainicijativa.com

+ GLAVNI PROGRASKI CILJEVI:

- Zalaganje za zaštitu prava žene u oblasti: obrazovanja, socijalne zaštite, zdravstvene zaštite i zaštite obitelji u Bosni i Hercegovini;
- Preventivno-promotivni rad: na promociji zdravlja žene (i njene obitelji), promociji zdravih stilova života, prevenciji bolesti i očuvanju zdravlja;
- Promocija profesionalnog napretka žene kroz sve faze njene karijere, putem mentorstva, edukacije i umrežavanja sa sličnim udruženjima i organizacijama;
- Promocija održivog puta profesionalne karijere žene, a posebno nezaposlene i žene sa invaliditetom, pružanjem i širenjem informacija o inovativnim i najboljim praksama;
- Suradnja i povezivanje sa partnerskim udruženjima u zemlji i inozemstvu;
- Suradnja sa lokalnom administracijom, privrednim subjektima, poslovnim organizacijama, obrazovnim institucijama i međunarodnim organizacijama;
- Organizacija konferencija, okruglih stolova i predavanja uz sudjelovanje institucija, privrednih subjekata, nevladinih organizacija, udruženja, međunarodnih organizacija i predstavnika fondova i diplomatskih misija;
- Pomoć članicama pri pripremi projekata i programa koji bi konkurirali za sredstva kod domaćih i stranih donatora i povezivanje sa partnerima iz zemlje i inozemstva;
- Organizacija okruglih stolova, rasprava, radionica i seminara radi ostvarivanja ciljeva Udruženja;
- Pronalaženje metoda za ostvarivanje prava žene, sa ciljem jednakog tretmana žena na cijeloj teritoriji Bosne i Hercegovine;
- Potpora i pomoć u razotkrivanju i prijavljivanju diskriminacije, mobinga i nasilja u obitelji;
- Izdavanje brošura, priručnika, knjiga i drugih publikacija radi ostvarivanja ciljeva Udruženja, u skladu sa Zakonima Bosne i Hercegovine;

Iniciranje izrade i usklađivanja propisa kod nadležnih organa, s ciljem poboljšanja statusa žena.

+ PLANVI ZA NAREDNI PERIOD:

Budući projekti temeljiće se na postavljenim Ciljevima udruženja definiranim Statutom Udruženja, za čije provođenje imamo adekvatan kadar.

+ KONTAK OSOBE:

- Sanda Kreitmayer Pešić, predsjednica Udruge
- Zlata Smajić, potpredsjednica Udruge
- Amela Hajvaz, tajnica Udruge

INFORMACIJE / DONATORI / POZIVI

1. 50 FONDACIJA KOJE DAJU GRANTOVE NVO-IMA KOJI RADE PROJEKTE ZA MLADE

Organizacije širom planete koje rade za djecu i mlade podržane su od strane raznih donatora kako bi ostvarile svoje ciljeve. Sve lokalne, regionalne i međunarodne organizacije koje rade sa djecom i mladima pozivaju se da pregledaju listu od 50 privatnih fondacija iz SAD, Velike Britanije, Njemačke, Švicarske, Holandije, Francuske i Ujedinjenih Arapskih Emirata.

► AGA KHAN RAZVOJNA MREŽA

Aga Khan razvojna mreža (AKDN) je grupa razvojnih agencija koje se fokusiraju na zdravlje, edukaciju, kulturu, ruralni razvoj, razvoj institucija i promociju ekonomskog razvoja. Posvećena je poboljšanju životnih uslova i mogućnosti za siromašne, bez obzira na njihova religijska ubjeđenja, porijeklo ili pol. AKDN implementira razvojne projekte i pruža mogućnosti finansiranja projektata u zemljama u kojima radi.

Polja djelovanja:

1. Umjetnost i kultura
2. Humanitarna pomoć
3. Razvoj psihološke podrške u zajednicama

Podobnost:

Aga Khan Razvojna mreža podržava projekte iz sljedećih zemalja – Afrika (Burkina Faso, Kongo DR, Obala Bjelokosti, Egipat, Kenija, Madagaskar, Mali, Mozambik, Tanzanija); Sjedinjene Američke Države; Azija (Afganistan, Bangladeš, Indija, Kazahstan, Kirgistan, Pakistan, Tadžekistan; Europa (Bosna i Hercegovina, Portugal, Švicarska, Ujedinjeno Kraljevstvo); Južna Amerika i Bliski Istok [Sirija]

Kako aplicirati?

Aplikacije za sve grantove se moraju predati u AKDN uredu u pomenutim zemljama.

Više na:

<http://www.mreza-mira.net/18362-grants-children-and-youth-projects/#sthash.nllVMSwq.dpuf>

2. EU POZIV ZA PROJEKTE: PODRŠKA JAČANJU KAPACITETA ORGANIZACIJA CIVILNOG DRUŠTVA U PRAĆENJU IZBORA

Broj poziva za projekte: EC/BiH/CFP/15/001

Referenca objave: EuropeAid/137-174/DD/ACT/BA

Delegacija Evropske unije u Bosni i Hercegovini objavljuje poziv za podnošenje prijedloga projekata za "Podrška jačanju kapaciteta organizacija civilnog društva u praćenju izbora", aktivnosti vezane za "Instrument podrške civilnom društvu, program 2014-2015" finansiranih iz Programa predpristupne Pomoći za 2014. i 2015. godinu.

Kompletna dokumentacija za prijavu projekata je dostupna na sljedećim web stranicama:

www.omladina-bih.net

<https://webgate.ec.europa.eu/europeaid/online-services/index.cfm?do=publi.welcome> i

<http://europa.ba/TendersExtEU.aspx?id=65&cat=11&lang=EN>

Rok za podnošenje projekata je 17. jula/srpnja 2015. godine u 14:00 sati po lokalnom vremenu.

Kompletna dokumentacija: [delegacijaEUBiH 2015051809023](#)

Više na:

<http://www.mreza-mira.net/18725-eu-poziv-za-projekte-precenje-izbora/#sthash.lxb5wcb3.dpuf>

3. APLICIRANJE ZA NED GRANTOVE

Svake godine National Endowment for Democracy (NED) daje direktne grantove nevladinim organizacijama širom svijeta, koje rade na unapređenju demokratskih ciljeva i jačanju demokratskih institucija. U 2012., NED je finansirao 1236 projekta u 92 zemlje širom svijeta. Iznosi granta variraju i zavise od veličine i obima projekta, ali prosječan grant traje 12 mjeseci i iznosi oko 50,000\$.

NED finansira samo NVO-e, organizacije civilnog društva, asocijacije, nezavisne medije, i druge slične organizacije.

NED prihvata aplikacije od strane organizacija koje rade u različitim okruženjima, uključujući novoosnovane demokratije, visoko represivna društva i zemlje koje prolaze demokratsku tranziciju.

NED ne daje grantove pojedincima, vladinim tijelima, ili institucijama koje podupire država kao što su javni univerziteti.

NED je zainteresovan za projekte lokalnih, nezavisnih organizacija i programa koji streme ka:

- Promovisanje i odbrana ljudskih prava i vladavine prava
- Podrška slobodi informacija i nezavisnih medija
- Jačanje demokratskih ideja i vrijednosti
- Promovisanje odgovornosti i transparentnosti
- Jačanje organizacija civilnog društva
- Jačanje demokratskih političkih procesa i institucija
- Promovirati građansko obrazovanje
- Podrška rezoluciju demokratske sukoba
- Promovisanje slobode udruživanja
- Jačanje široke tržišne ekonomije

Projekti treba da budu u skladu sa NED ciljevima koji se nalaze na:

[NED Statement of Principles and Objectives](#)

Za više informacija posjetite [Where We Work](#)

Rok za podnošenje projektnih prijedloga je 19.06.2015.

Više informacija na: <http://www.ned.org/grantseekers>

4. GLOBALNI INOVATIVNI FOND - TRANSFORMACIJA IDEJA U UČINAK

Globalni Inovativni fond investira u društvene inovacije koje za cilj imaju poboljšanje života i prilika za milione ljudi u zemljama u razvoju. Kroz naše grantove podržavamo rješenja problema globalnog razvoja od društvenih organizacija, profitnih firmi, neprofitnih organizacija, istraživača kao i vladinih agencija. Aplikacije se primaju tokom cijele godine, ne postoji neki određeni rok za apliciranje.

Tokom sljedećih mjeseci GIF će raditi na razvijanju svojih procesa, višeg organizacionog tima i na kapitalu. Planiramo da uradimo skroman broj ulaganja tokom ovog perioda, i očekujemo da ćemo biti operativni u punom kapacitetu tokom jeseni 2015.

GIF pozdravlja inovativne aplikacije, isplativa rješenja koja adresiraju bilo koji veći izazov u bilo kojoj zemlji (ili u više njih) u zemljama u [razvoju](#).

Svako može aplicirati, uključujući i ekipe iz društvenih preduzeća, profitnih firmi, neprofitne organizacije, vladine agencije, međunarodne organizacije, i istraživači u bilo kojoj zemlji.

Sve aplikacije se trebaju priložiti pute GIF web aplikacijskog portala.

Molimo vas pročitajte sljedeće dokumente prije nego aplicirate:

- [Aplikacijski proces](#)
- [Šta tražimo od aplikacija](#)
- [Šta ne finansiramo](#)

Više informacija na: www.globalinnovation.fund

Dragi prijatelji,

Ukoliko ste zainteresovani da se u mjesečnom informativnom biltenu Omladinskog resursnog centra (ORC) Tuzla i Omladinske mreže Bosne i Hercegovine objave: vaši pozivi za zajedničke aktivnosti i saradnju, informacije o aktivnosti, konkursi za radna mjesta, apeli za pomoć ili podršku, saopštenja za javnost i svi drugi nekomercijalni oglasi, možete se javiti na jednu od dole navedenih adresa.

Rok za dostavljanje informacija za svako naredno izdanje je 30.-ti u mjesecu.

WEB Stranica Mreže:

sCh design

Webmaster:

Emir Delalić-Zeko -
Tuzla

emir.delalic@gmail.com

web: www.omladina-bih.net

mejling lista Mreže:

posta@omladina-bih.net

Adrese za slanje vaših informacija za mjesečni bilten:

hcatuzla@bih.net.ba; orctuzla@bih.net.ba

fax: 035 258 077

Omladinski resursni centar Tuzla

Hadži Bakirbega Tuzlića 1,
75000 Tuzla

tel / fax: 035 258 077

e-mail: orctuzla@bih.net.ba

hcatuzla@bih.net.ba

Mjesečni bilten uređuje Omladinski resursni centar - ORC Tuzla